

Gojgaeq Ronghndwen

Daihgya ndei, gou dwg aen ronghndwen caeuq daihgya ngoenz-ngoenz raen naj haenx. Daj ciuhgeq daengz ciuhneix, ndawbiengz riuz haujlai gojgaeq sienfangz gyaundeidei gvedaengz gou, neix hawj gou bienq baenz boux raen boux gyaenz, geizsaed doenghgij gojgaeq riuzcienz neix cungj dwg vunzlai siengjngeix gyaundeidei, lajneix gou couh hainduj gangj gij gojgaeq gou lo.

Haujlai haujlai nanz gaxgonq, gou caeuq daxmeh gou—daihdeih, soqlaiz doengzcaez gvaq saedceij angqvau an'onj. Miz ngoenz ndeu, miz boux vunzrwix dwglau ndeu—Buenzgoj okdaeuj lo. De dwg boux vunzchung ndangmaengh dangqnaz, dandan yungh fag fouj ndeu couh dawz gou caeuq daxmeh faenhai, hawj gou deng caeuq daxmeh doxmbek bae. Buenzgoj gvaqseiq gaxgonq, lij nda gyang mbwn ndei, baez daengz banngoenz, gwnz mbwn cungj ok aen giuzfeiz hung ndeu (youq ndaw biengz sou hix heuhguh daengngoenz), seiz-

neix gou langh okdaeuj yawj daxmeh, lej ne couh deng aen giuz hung loijsieng, haenq ne couh deng doenghgij feizmbaw aen giuz hung baeu dai bae. Bonjlaiz nyinhnaeuz caj Buenzgoj dai bae le, song mehlwg doxmbek haujlai nanz haenx couh ndaej caiq doxcomz lo, ndaek Buenzgoj dwghaemz neix youh yungh cungj banhfap yakrwix neix daeuj sawj gou caeuq daxmeh doxmbek youq.

Yienghneix gou cijndei ndoj aen giuz hung, banngoenz ndoj youq ndaw fwj, banhaemh bae yawj daxmeh gou. Baez daengz banhaemh, gou couh diemj haujlai aen daengloengz iq rongh hwnjdaeuj, neix ndaej caeuq daxmeh youq gizgyae doxmuengh. Gou rox cimyawj gij daenj cang daxmeh, moix ngoenz miz maz bienq; gou rox cimyawj daxmeh ciengx ganq sou vunzloi, yawj sou daej, yawj sou riu. Banhaemh seizgan dinj lai, baez daengz mbwn ngamqngamq rongh, gou couh sikhaek ndoj hwnjdaeuj.



Couh yienghneix le, ngoenz liux ngoenz dem, bi liux bi dem.

Youq gizneix, gou siengj cingj daihgya coengh gou mbat ndeu, cingj coengh gou ndeindei ciuqgoq daxmeh

daihdeih, mbouj hawj de faj naj gyaundeidei haenx bienq ndaem bienq mong, gyo'mbaiq gyoengqsou!

(Swng Dingzdingz raiz Daeglungz hoiz)

Gou Miz Aen Loqsiengj Ndeu

Vunzraeuz ca mbouj lai bouxboux cungj miz aen loqsiengj miz yinxdaeuz ndeu, hoeng aen loqsiengj gou dwg fazmingz cungj gihgi rox caemdingh hozhwnj vaiq dangqmaz ndeu.

Seizneix haujlai vunz beizheiq gaenj yungzheih hozhwnj, gou hix maij hozhwnj. Hoeng gou dwg hozhwnj ndaw dungx, hozhwnj ndaw dungx lij ndei di, cij sieng ndang swheij, mbouj yingyangj bouxwnq. Danghnaeuz boux hozhwnj mbaet mbouj ndaej, lumj byagiengh-feiz conh'ok nei, hozhwnj coh bouxwnq, cungj vunz neix langh mbouj haenq couh cauxbaenz doxmoeb doxdaj, haenq couh cauhaenz famhcoih bae lo.

Couh yienghneix, gou siengj fazmingz cungj gihgi ndeu, hawj bouxboux cungj ndaej caemdingh hozhwnj vaiq dangqmaz, bingzbingz dinghdingh caeuq bouxwnq gangjavah, mbouj caiq seiz-bienh hozhwnj. Yienghneix couh doiq haujlai vunz ndei lo, youh ndaej hawj gyoengq bouxcoz lwnyezrauh caeuq bouxlaux liz aen dou gamlauz gya' gya' bae, bienq baenz engqgya gvai.

Cungj gihgi neix baenz yiengh seiqfueng, dawz youq ndawfwngz unqnomnom, gveng mbouj vaih lij fuengz

raemx fuengz feiz dem. Mwngz hozhwnj seiz, couh yungh fwngz gaem de, de rox gaengawq gij singgwz mwngz caeuq mwngz hozhwnj cingz-doh, boqsoengq souj go ndeu. Cungj go neix unqnomnom, mbaeumbimbi, cingq haeuj ndaw sim mwngz bae, caemh-caiq lij hawj mwngz lumz gij nyapnyuk, gij siengsim haenx bae.....

Ceiq leixhailh dwg, cungj gihgi neix rox gajndeidei beizheiq vunz, moix yungh mbat ndeu, beizheiq couh ndei di ndeu. Danghnaeuz genhciz sawjyungh duenh seizgan ndeu, gojnaengz gvaqlaeng couh mbouj caiq yungh daengz cungj gihgi neix lo, hix mbouj hozhwnj lo.

Gou siengj daengz giz-neix, lienz swheij cungj caj mbouj gib siengj sawq baez ndeu. Yienghneix, gou siengj

dwk swheij cingq yungh cungj gihgi neix: Gou gaem dwk gihgi, caj yaep ndeu le, gihgi hainduj boqcuengq yinhyoz. Cungj wenqngon vuenyungz neix, hawj gou sikhaek lumz gij nyapnyuk bae caez, hix hawj gou soeng roengzdaeuj, lumj dwg youq aen congz unqnomnom haenx gig anyienz ninz ciengz ndeu.

Aen gihgi neix doiq gyoengqvunz miz leih, couh dwg di gungyen gou hawj guekgya ndeu. Danghnaeuz gou majhung le caen rox maeqguh ok cungj gihgi neix, gou couh mienxcienz hawj boux beizheiq yak haenx, hawj vunzlai ndaej vuenyungz, bingzdingh gvaq saedceij, mbouj caiq hawj hozhwnj cungj fangzgvaiq neix ciemq youq ndawsim raeuz.

(Yangz Hauveih raiz Veiz Yinyiz hoiz)



Baeuh Makbug

Bi' gvaq seizcou, makbug gwnz gobug baenz lo, aen' aen cungj henjrwgrwg bae, yinxvunz dangqmaz. Gou caeuq daeggo gietdingh bae baeuh geij aen daeuj gaj bakngah.

Baenzlawz baeuh makbug roengzdaeuj ne? Daeggo gya' baez ngengq, naeuz: "Miz banhfap la." Cijraen de gip gonj rin ndeu hwnjdaeuj, haenqrengz baez baeuh, gonjrin lumj fagbiu mbin bae. Yienznaeuz mbouj baeuh deng aen makbug, hoeng foengx hwnj bang roeg ndeu. Daeggo hoz lij mbouj nyied, baez ndeu, song baez, sam baez.....hoeng aen makbug lij dinghyouq, mbouj ning saek di. Gou caeuq daeggo cungj hoznae lai. Caeklaiq, dou cingq simnae seizhaenx, daxmeh daeuj lo. Cijraen daxmeh ndaw fwngz gaem diuz saux ndeu gyongz doxhwnj, gyongz geij mbat liux, aen makbug ndeu "bwngz" dwk sing ndeu doek roengzdaeuj. Gou caeuq daeggo angqyoekyoek, guhmuengz cung gvaqbae gip aen makbug hwnjdaeuj.

Dauq daengz ranz le, dou doq gwn makbug, doq dingq daxmeh gangj "Vunz ciuhgeq gangj 'yaek guh baenz saeh, aeu hongdawz rauh gonq', ndigah, baenzlawz genj hongdawz couh gig youqgaenj! Sou gaej hanh cungj fuengfap ndeu ndwi, aeu lai doengh uk, cijndaej ngeix ok aen banhfap ceiq ndei."

Aen makbug ngoenz haenx lumjnaeuz beij gaxgonq engqgya hom bw!

(Yangz Gyahhih raiz Daengningh hoiz)